



ԳՆՈՒՄՆԵՐԻ ԲՈՂՈՔԱՐԿՄԱՆ ԽՈՐՀՈՐԴ

ք. Երևան

23.11.2015թ.

Ո Ր Ո Շ ՈՒ Մ

ՀՀ գնումների բողոքարկման խորհրդի

ՍՑ-25/15

ՀՀ գնումների բողոքարկման խորհրդի (այսուհետ նաև՝ Խորհուրդ) քննող հանձնաժողովը՝ գործելով Խորհրդի անունից և ուսումնասիրելով ՀՀ ֆինանսների նախարարության 25.06.2015թ. N 1/73-1/16551-15 գրությամբ ներկայացված «Էկոպեոլիտ» ՍՊԸ-ին (ՀՎՀՀ 03500722) գնումների գործընթացին մասնակցելու իրավունք չունեցող մասնակիցների ցուցակում ներառելու պաշտոնական ընթացակարգով նախաձեռնած բողոքը (այսուհետ նաև՝ ՍՑ-ԳԲԽ-25/15 բողոք), ինչպես նաև ուսումնասիրելով ՍՑ-ԳԲԽ-25/15 բողոքի վերաբերյալ «Գնումների աջակցման կենտրոն» ՊՈԱԿ-ի 19.11.2015թ. ներկայացրած եզրակացությունը պարզեց.

1. ՀՀ ֆինանսների նախարարության ներկայացրած փաստերը և պահանջը

ՀՀ ֆինանսների նախարարությունը 25.06.2015թ. N 1/73-1/16551-15 գրությամբ դիմել է «Գնումների աջակցման կենտրոն» ՊՈԱԿ-ին (այսուհետ նաև՝ Կենտրոն)՝ խնդրելով ուսումնասիրել «Էկոպեոլիտ» ՍՊԸ-ին (այսուհետ նաև՝ Ընկերություն) գնումների գործընթացին մասնակցելու իրավունք չունեցող մասնակիցների ցուցակում (այսուհետ նաև՝ Ցուցակ) ներառելու հիմքերը և այդպիսի հիմքերի առկայության դեպքում ձեռնարկել անհրաժեշտ միջոցներ Ընկերությանը Ցուցակում ներառելու համար:

2. «Էկոպեոլիտ» ՍՊԸ-ի ներկայացրած փաստաթղթերը և դիրքորոշումը

«Գնումների աջակցման կենտրոն» ՊՈԱԿ-ը կարծիք ստանալու նպատակով 01.07.2015թ. N 01/04.1/1458-15 գրությամբ դիմել է «Էկոպեոլիտ» ՍՊԸ-ին:

«Էկոպեոլիտ» ՍՊԸ-ն 14.07.2015թ. թիվ ՀՀ/48 գրությամբ Կենտրոնին հայտնել է, որ 2014թ. Ընկերության տարեկան հաշվետվությամբ 4-րդ եռամսյակում իրականացվել է գրոյական ԱԱՀ-ով գործարք՝ համապատասխան հիմնավորմամբ: Միևնույն ժամանակ արտադրանքի իրացման դեպքում անհրաժեշտ էր կատարել վերջնահաշվարկ, որի հետևանքով առաջացել էր չնախատեսված պարտք, որի վճարումը, ցավոք, մի փոքր ձգձգվել է, քանի որ այդ ամիսներին տեղի է ունենում շինարարության տեմպերի գրեթե լիովին սառեցում և Ընկերությունը հնարավորություն չի ունեցել հայտնաբերված ոչ սովորական պարտքը մարելու: Այդ պատճառով է միայն, որ նշված գումարը ժամանակին չի վճարվել, սակայն գումարն առաջանալուն պես, անմիջապես փոխանցվել է: Ընկերությունը նշել է նաև, որ նման խախտումներ երբևէ նախկինում չի ունեցել:

3.«Հայկական ատոմային էլեկտրակայան» ՓԲԸ-ի ներկայացրած փաստաթղթերը և դիրքորոշումը

«Գնումների աջակցման կենտրոն» ՊՈԱԿ-ը 01.07.2015թ. թիվ 01/04.1/1459-15 գրությամբ դիմել է «Հայկական ատոմային էլեկտրակայան» ՓԲԸ-ին (այսուհետ նաև՝ Պատվիրատու)՝ խնդրելով կարծիք տալ Ընկերությանը Ցուցակում ներառելու հարցի վերաբերյալ և Կենտրոնին տրամադրել «ՀԱԷԿ-ԲԸԱՀԱՊՁԲ-5/15» ծածկագրով ընթացակարգին (այսուհետ նաև՝ Ընթացակարգ) վերաբերող փաստաթղթերի պատճենները:

Պատվիրատուն 28.07.2015թ. թիվ 40-959 գրությամբ Կենտրոնին է տրամադրել Ընթացակարգին վերաբերող փաստաթղթերի պատճենները:

4. ՍՑ-ԳԲԽ-25/15 բողոքի վերաբերյալ «Գնումների աջակցման կենտրոն» ՊՈԱԿ-ի դիրքորոշումը

«Գնումների աջակցման կենտրոն» ՊՈԱԿ-ը Խորհրդին է ներկայացրել իր 19.11.2015թ. եզրակացությունը և առաջարկել է ՀՀ ֆինանսների նախարարության

25.06.2015թ. N 1/73-1/16551-15 գրությամբ ներկայացված «Էկոպեոլիտ» ՍՊԸ-ին (ՀՎՀՀ 03500722) գնումների գործընթացին մասնակցելու իրավունք չունեցող մասնակիցների ցուցակում ընդգրկելու պաշտոնական ընթացակարգով նախաձեռնած բողոքը բավարարել՝ Ընկերությանը ներառել գնումների գործընթացին մասնակցելու իրավունք չունեցող մասնակիցների ցուցակում՝ ՀՀ գնումների բողոքարկման խորհրդի որոշումը կայացվելու օրվանից հաշված մեկ տարվա ընթացքում Ընկերության կողմից գնումների գործընթացին մասնակցելու հայտ ներկայացնելու դեպքում, այդ պահից հաշված երեք տարի ժամկետով:

5. ՍՑ-ԳԲԽ-25/15 պաշտոնական ընթացակարգով նախաձեռնված բողոքի քննության համար էական նշանակություն ունեցող փաստերը

ՀՀ ֆինանսների նախարարության 25.06.2015թ. N 1/73-1/16551-15 գրությամբ ներկայացված «Էկոպեոլիտ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու պաշտոնական ընթացակարգով նախաձեռնված բողոքի քննության համար էական նշանակություն ունեն հետևյալ փաստերը՝

1. «Հայկական ատոմային էլեկտրակայան» ՓԲԸ-ի կողմից փքեցրած պեոլիտի հատուկ զտանյութի ձեռքբերման նպատակով կազմակերպվել է «ՀԱԷԿ-ԲԸԱՀԱՊՁԲ-5/15» ծածկագրով առանց գնումների հայտարարությունը նախապես հրապարակելու բանակցային ընթացակարգ, որին մասնակցելու նպատակով հայտ է ներկայացրել «Էկոպեոլիտ» ՍՊԸ-ն:

2. Ընթացակարգի գնահատող հանձնաժողովը 29.05.2015թ. տեղի ունեցած նիստի N 2 արձանագրության 2.2 կետով որոշել է առաջին տեղը զբաղեցրած մասնակից ճանաչել «Էկոպեոլիտ» ՍՊԸ-ին:

3. Պատվիրատուն ՀՀ կառավարության 10.02.2011թ. N 168-Ն որոշմամբ հաստատված «Գնումների գործընթացի կազմակերպման» կարգի (այսուհետ՝ Կարգ) 47-րդ կետի 1-ին ենթակետով նախատեսված տվյալների ճշտման մասին 08.06.2015թ. կատարած հարցմամբ ՀՀ ֆինանսների նախարարությանը խնդրել է տրամադրել տեղեկատվություն Ընկերության կողմից 2015թ. մայիսի 29-ի դրությամբ (հայտը ներկայացնելու օրվա դրությամբ) Հայաստանի Հանրապետության պետական բյուջեի նկատմամբ ժամկետանց հարկային պարտավորություն ունենալու վերաբերյալ:

4. Ի պատասխան վերոհիշյալ հարցմանը՝ ՀՀ ֆինանսների նախարարության կողմից 10.06.2015թ. Պատվիրատուին տրամադրվել է եզրակացություն, համաձայն որի «Էկոպեռլիտ» ՍՊԸ-ն հայտը ներկայացնելու օրվա դրությամբ (29.05.2015թ.) ունեցել է ժամկետանց հարկային պարտավորություն՝ 677540 ՀՀ դրամի չափով:

5. Ընթացակարգի գնահատող հանձնաժողովը 11.06.2015թ. տեղի ունեցած նիստի N 3 արձանագրության՝ 1-ին կետով որոշում է կայացրել մերժել «Էկոպեռլիտ» ՍՊԸ-ի հայտը և Ընթացակարգը հայտարարել չկայացած:

6. Ընկերությունը 14.07.2015թ. թիվ ՀՀ/48 գրությամբ Կենտրոնին հայտնել է, որ Ընկերությունը հնարավորություն չի ունեցել պարտքը մարել, այդ պատճառով է միայն, որ նշված գումարը ժամանակին չի վճարվել, սակայն գումարն առաջանալուն պես, անմիջապես փոխանցվել է: Ընկերությունը նշել է նաև, որ նման խախտումներ երբևէ նախկինում չի ունեցել:

6. Խորհրդի հիմնավորումները և եզրահանգումը

Քննելով ՍՑ-ԳԲԽ-25/15 բողոքը, Խորհուրդը գտնում է, որ այն ենթակա է բավարարման հետևյալ հիմնավորմամբ.

«Գնումների մասին» ՀՀ օրենքի (այսուհետ նաև՝ Օրենք) 5-րդ հոդվածի 1-ին մասի 2-րդ կետի համաձայն՝ գնումների ընթացակարգերին մասնակցելու իրավունք չունեն անձինք, որոնք ունեն ժամկետանց պարտքեր Հայաստանի Հանրապետության հարկային և պարտադիր սոցիալական ապահովության վճարների գծով:

Օրենքի 5-րդ հոդվածի 1-ին մասի 4-րդ կետի «բ» ենթակետի համաձայն՝ մասնակիցն ընդգրկվում է գնումների գործընթացին մասնակցելու իրավունք չունեցող մասնակիցների ցուցակում, եթե հայտը ներկայացնելու պահին նախորդող տարվա ընթացքում գնման գործընթացի շրջանակում ներկայացրել է կեղծ տվյալ:

Օրենքի 48-րդ հոդվածի 6-րդ մասի 7-րդ կետի համաձայն՝ գնումների բողոքարկման խորհուրդն իրավունք ունի որոշում կայացնելու մասնակցին գնումների գործընթացին մասնակցության իրավունք չունեցող մասնակիցների ցուցակում ներառելու մասին:

Կարգի 125-րդ կետի 5-րդ ենթակետի «բ» պարբերության համաձայն՝ «Գնումների մասին» ՀՀ օրենքի 5-րդ հոդվածի 2-րդ մասով նախատեսված՝ գնումների բողոքարկման խորհրդի ընդունած որոշման հիման վրա մասնակիցը գնումների գործընթացին

մասնակցելու իրավունք չունեցող մասնակիցների ցուցակում ընդգրկվում է երեք տարի ժամկետով, եթե գնման գործընթացի շրջանակում ներկայացրել է կեղծ տվյալ:

Խորհուրդը արձանագրում է, որ ՀՀ ՖՆ տեղեկատվական տեխնոլոգիաների ենթակառուցվածքների ներդրման և զարգացման վարչության կողմից տրամադրված 10.06.2015թ. եզրակացության՝ «Էկոպեոլիտ» ՍՊԸ-ն հայտը ներկայացնելու օրվա դրությամբ՝ 29.05.2015թ., ունեցել է ժամկետանց հարկային պարտավորություն՝ 677540 ՀՀ դրամի չափով, ինչի պայմաններում Ընկերությունը, Օրենքի 5-րդ հոդվածի 1-ին մասի 2-րդ կետի համաձայն, իրավունք չունի մասնակցելու գնումների ընթացակարգերին:

Մինչդեռ, Ընկերությունը «ՀԱԷԿ-ԲԸԱՀԱՊԶԲ-5/15» ծածկագրով առանց գնումների հայտարարությունը նախապես հրապարակելու բանակցային ընթացակարգին մասնակցելու նպատակով 29.05.2015թ. հայտ ներկայացնելով՝ փաստորեն հավաստել է, որ իրավունք ունի մասնակցելու գնումների ընթացակարգերին, ինչը հայտը ներկայացնելու օրվա դրությամբ ՀՀ պետական բյուջեի նկատմամբ ժամկետանց հարկային պարտավորություններ ունենալու պայմաններում Ընկերության կողմից հանդիսանում է «Գնումների մասին» ՀՀ օրենքի 5-րդ հոդվածի 1-ին մասի 4-րդ կետի «բ» ենթակետով նախատեսված գնման գործընթացի շրջանակում կեղծ տվյալի ներկայացում:

Ընդ որում, «Էկոպեոլիտ» ՍՊԸ-ն Կենտրոնին ուղղված 14.07.2015թ. թիվ ՀՀ/48 գրությամբ, ըստ էության, ընդունել է Հայաստանի Հանրապետության պետական բյուջեի նկատմամբ ժամկետանց հարկային պարտավորություն ունենալու հանգամանքը՝ հայտնելով, որ Ընկերությունը՝ հնարավորություն չի ունեցել պարտքը մարել, այդ պատճառով է միայն, որ նշված գումարը ժամանակին չի վճարվել:

Ելնելով վերոգրյալից և ղեկավարվելով «Գնումների մասին» ՀՀ օրենքի 48-րդ հոդվածի 6-րդ մասի 7-րդ կետով՝ ՀՀ գնումների բողոքարկման խորհուրդը

Ո Ր Ո Շ Ե Ց

ՀՀ ֆինանսների նախարարության 25.06.2015թ. N 1/73-1/16551-15 գրությամբ «Էկոպեոլիտ» ՍՊԸ-ին (ՀՎՀՀ 03500722) գնումների գործընթացին մասնակցելու իրավունք չունեցող մասնակիցների ցուցակում ընդգրկելու պաշտոնական ընթացակարգով նախաձեռնված բողոքը բավարարել՝ Ընկերությանը ներառել գնումների գործընթացին մասնակցելու իրավունք չունեցող մասնակիցների ցուցակում՝ ՀՀ գնումների բողոքարկման խորհրդի որոշումը կայացվելու օրվանից հաշված մեկ տարվա

ընթացքում Ընկերության կողմից գնումների գործընթացին մասնակցելու հայտ ներկայացնելու դեպքում, այդ պահից հաշված երեք տարի ժամկետով:

ՀՀ գնումների բողոքարկման խորհրդի որոշումն իրավապարտադիր է:

ՀՀ գնումների բողոքարկման խորհրդի կայացրած որոշումը կարող է բողոքարկվել դատական կարգով:

Բողոքը քննող հանձնաժողով՝

Նախագահ՝



Արման Մնացականյան

Անդամներ՝



Էդուարդ Շախկյան



Կարապետ Խաթեբոյան